

欽定北齊書

卷四十三之五十

欽定四庫全書

卷一百一十五

北齊書卷四十三

隋太子通事舍人李百藥撰

列傳第三十五

李稚廉

封述

許諱

羊烈

源彪

李稚廉趙郡高邑人也齊州刺史義深之弟稚廉少而寡欲爲兒童時初不從家人有所求請家人嘗故以金寶授之終不取強付輒擲之於地州牧以其蒙稚而廉故名曰稚廉聰敏好學年十五頗尋覽五經章句屬葛榮作亂本郡紛擾違難赴京永安中釋褐奉朝請普泰初開府記室龍驤將軍廣州征南府錄事參軍不行尋轉開府諮議參軍事前將軍天平中高祖擢爲泰州開府長史平北將軍稚廉緝譖將士軍民樂悅高祖頻幸河東大相嗟賞轉爲世宗驃騎府長史詔以濟州控帶川陸接對梁使尤須得人世宗薦之除濟州儀同長史又遷瀛州長史高祖行經冀州摠合河北六州文籍商校戶口增損高祖親自部分多在馬上徵責文簿指景取備事緒非一稚廉每應機立成恒先期會莫不雅合深旨爲諸州准的高祖顧謂司馬子如曰觀稚廉處分快人意也因集文武數萬人令郎中杜弼宣旨慰勞仍請諸州長史

守令等諸人並謝罪稚廉獨前拜恩觀者咸歎美之其日賜以牛酒高祖還并以其事告世宗世宗喜而語人曰吾足知人矣世宗嗣事召詣晉陽除霸府掾謂杜弼曰并州王者之基須好長史各舉所知時雅有所稱皆不允衆人未荅世宗乃謂陳元康曰我教君好長史處李稚廉卽其人也遂命爲并州長史常在世宗第內與隴西辛術等六人號爲館客待以上賓之禮天保初除安南將軍太原郡守顯祖嘗召見問以治方語及政刑寬猛帝意深文峻法稚廉固以爲非帝意不悅語及楊愔誤稱爲楊公以應對失宜除濟陰郡守帶西兗州刺史徵拜太府少卿尋轉廷尉少卿遷太尉長史肅宗卽位兼散騎常侍省方大使行還所奏多見納用除合州刺史亦有政績未滿行懷州刺史還朝授兼太僕卿轉大司農卿趙州大中正天統元年加驃騎大將軍大理卿世稱平直爲南青州刺史未幾徵爲并省都官尙書武平五年三月卒於晉陽年六十七贈儀同三司信義二州刺史吏部尙書

封述字君義渤海蓆人也父軌廷尉卿濟州刺史述有幹用年十八爲濟州征東府鎧曹參軍高道穆爲御史中尉敢爲御史遷大司馬清河王開府記室參軍兼司徒主簿大昌中除尙書三公郎中以平幹稱天平中增損舊事爲麟趾新格其名法科條皆述刪定梁散騎常侍陸晏子沈警來聘以述兼通直郎使梁還遷世宗大將軍府從事中郎監京畿事武定五年除彭城太守當郡督再行東徐州刺史武定七年

除廷尉少卿八年兼給事黃門侍郎齊受禪與李獎等八人充大使巡省方俗問民疾苦天保三年除清河太守遷司徒左長史行東都事尋除海州刺史太寧元年徵授大理卿河清三年勅與錄尚書趙彥深僕射魏收尚書陽休之國子祭酒馬敬德等議定律令天統元年遷度支尚書三年轉五兵尚書加儀同三司武平元年除南兗州刺史更滿還朝除左光祿大夫又除殿中尚書述久爲法官明解律令議斷平允深爲時人所稱而厚積財產一無饋遺雖至親密友貧病困篤亦絕於拯濟朝野物論甚鄙之外貌方整而不免請謁迴避進趨頗致嗤駭前妻河內司馬氏一息爲娶隴西李士元女大輸財聘及將成禮猶競懸違述忽取供養像對士元打像作誓士元笑曰封公何處常得應急像須誓便用一息娶范陽盧莊之女述又逕府訴云送贏乃嫌脚踏評田則云鹹薄銅器又嫌古廢皆爲吝嗇所及每致紛紜子元武平末太子舍人述弟詢字景文魏員外郎武定中永安公開府法曹稍遷尚書起部郎中轉三公郎出爲東平原郡太守遷定州長史又除河間郡守入爲尚書左丞又爲濟南太守隋開皇中卒詢關涉經史清素自持歷官皆有幹局才具治郡甚著聲績民吏敬而愛之

許惇字季良高陽新城人也父護魏高陽章武二郡太守惇清識敏速達於從政任司徒主簿以能判斷見知時人號爲入鐵主簿稍遷陽平太守當時遷都鄴陽平卽是畿郡軍國責辦賦斂無准又勳貴屬請

朝夕徵求惇並御之以道上下無怨治爲天下第一特加賞異圖形於闕詔頒天下遷魏尹出拜齊州刺史轉梁州刺史治並有聲遷大司農會侯景叛王思政入據潁城王師出討惇常督漕軍無乏絕引洧水灌城惇之策也遷殿中尙書惇美鬚髯下垂至帶省中號爲長鬚公顯祖嘗因酒酣握惇鬚稱美遂以刀截之唯留一握惇懼因不復敢長時人又號爲齊鬚公世祖踐祚領御史中丞爲膠州刺史尋追爲司農卿又遷大理卿再爲度支尙書歷太子少保少師光祿大夫開府儀同三司尙書右僕射特進賜爵萬年縣子食下邳郡幹以年老致仕於家三年卒惇少純直晚更浮動齊朝體式本州大中正以京官爲之同郡邢邵爲中書監德望甚高惇與邵競中正遂馮附宋欽道出邵爲刺史朝議甚鄙薄之雖久處朝行歷官清顯與邢邵魏收陽休之崔劼徐之才之徒比肩同列諸人或談說經史或吟詠詩賦更相嘲戲欣笑滿堂惇不解劇談又無學術或竟坐杜口或隱几而睡深爲勝流所輕子文紀武平末度支郎中文紀弟文經勤學方雅身無擇行口無戲言武平末殿中侍御史隋開皇初侍御史兼通直散騎常侍聘陳使副主爵侍郎卒於相州長史惇兄遜字仲讓有幹局乾明中平原太守卒贈信州刺史遜子文高司徒

據

羊烈字僧卿太山鉅平人也晉太僕卿琇之八世孫魏梁州刺史社之弟子父靈珍魏兖州別駕烈少通

敏自修立有成人之風好讀書能言名理以立學知名魏孝昌中烈從兄侃爲太守據郡起兵外叛烈潛知其謀深懼家禍與從兄廣平太守敦馳赴洛陽告難朝廷將加厚賞烈告人云譬如斬手全軀所存者大故爾豈有幸從兄之敗以爲己利乎卒無所受弱冠州辟主簿又兼治中從事刺史方以吏事爲意以幹濟見知釋巾太師咸陽王行參軍遷祕書郎顯祖初爲儀同三司開府倉曹參軍事天保初授太子步兵校尉輕車將軍尋遷并省比部郎中除司徒屬頻歷尙書祠部左右民郎中所在咸爲稱職九年除陽平太守治有能名是時頻有災蝗犬牙不入陽平境勅書褒美焉皇建二年遷光祿少卿加龍驤將軍兗州大中正又進號平南將軍天統中除大中大夫兼光祿少卿武平初除驃騎將軍義州刺史尋以老疾還鄉周大象中卒烈家傳素業閨門修飾爲世所稱一門女不再醮魏太和中於兗州造一尼寺女寡居無子者並出家爲尼咸存戒行烈天統中與尙書畢義雲爭兗州大中正義雲盛稱門閥云我累世本州刺史卿世爲我家故吏烈荅云卿自畢軌被誅以還寂無人物近日刺史皆是疆場之上彼此而得何足爲言豈若我漢之河南尹晉之太傅名德學行百代傳美且男清女貞足以相冠自外多可稱也蓋譏義雲之帷薄焉祉子深魏中書令深子肅以學尙知名世宗大將軍府東閣祭酒乾明初冀州治中趙郡王爲巡省大使肅以遲緩不任職解朝議以肅無罪尋復之天統初遷南兗州長史武平中入文林館撰書

尋出爲武德郡守烈弟脩有才幹大寧中卒於尙書左丞子玄正武平末將作丞隋開皇中民部侍郎卒於隴西郡贊治

源彪字文宗西平樂都人也父子恭魏中書監司空文獻公文宗學涉機警少有名譽魏孝莊永安中以父功賜爵臨潁縣伯除員外散騎常侍天平四年涼州大中正遭父憂去職武定初服闋吏部召領司徒記室加平東將軍世宗攝選沙汰臺郎以文宗爲尙書祠部郎中仍領記室轉太子洗馬天保元年除太子中舍人乾明初出爲范陽郡守皇建二年拜涇州刺史文宗以恩信待物甚得邊境之和爲隣人所欽服前政被抄掠者多得放還天統初入爲吏部郎中遷御史中丞典選如故尋除散騎常侍仍攝吏部加驃騎大將軍屬秦州刺史宋嵩卒朝廷以州在邊垂以文宗往蒞涇州頗著聲績除秦州刺史乘傳之府特給後部鼓吹文宗爲治如在涇州時李孝貞聘陳陳主謂孝貞曰齊朝遣遣源涇州來瓜步眞可謂和通矣尋加儀同三司武平二年徵領國子祭酒三年遷祕書監陳將吳明徹寇江南歷陽瓜步相尋失守趙彥深於起居省密訪文宗曰吳賊侏張遂至於此僕妨賢旣久憂懼交深今者之勢計將安出弟住在涇州甚悉江淮閒情事今將何以禦之對曰荷國厚恩無由報効有所聞見敢不盡言但朝廷精兵必不肯多付諸將數千已下復不得與吳楚爭鋒命將出軍反爲彼餌尉破胡人品王之所知進旣不得退又

未可敗績之事匪朝伊夕王出而能入朝野傾心脫一日參差悔無所及以今日之計不可再三國家待
遇淮南失之同於蒿箭如文宗計者不過專委王琳淮南招募三四萬人風俗相通能得死力兼令舊將
淮北捉兵足堪固守且琳之於曇瑱不肯北面事之明矣竊謂計之上者若不推赤心於琳別遣餘人擊
肘復成速禍彌不可爲彥深歎曰弟此良圖足爲制勝千里但口舌爭來十日已不見從時事至此安可
盡言因相顧流涕武平七年周武平齊與陽休之袁聿修等十八人同勅入京授儀同大將軍司成下大
夫隋開皇初授莒州刺史至州遇疾去官開皇六年卒年六十六文宗以貴族子弟昇朝列才識敏贍以
幹局見知然好遊詣貴要之門故時論以爲善於附會子師少好學明辨有識悟尤以吏事知名河清初
司空參軍事歷侍御史太常丞尙書左外兵郎中隋開皇中尙書比部考功侍郎大業初卒於大理少卿
文宗弟文舉亦有才幹歷尙書比部二千石郎中定州長史帶中山郡守卒於太尉長史文宗從父兄楷
字邠延有器幹善草隸書歷尙書左民部郎中治書侍御史長樂中山郡守京畿長史黃門郎假儀同三
司齊滅朝貴知名入周京者度支尙書元脩伯魏文成皇帝之後清素寡欲明識理體少歷顯職尙書郎
治書侍御史司徒左長史數郡太守光州刺史所在皆著聲績及爲度支屬政荒國感儲藏虛竭賦役繁
興脩伯憂國如家恤民之勞兼濟時事詢謀宰相朝夕孜孜與錄尙書唐書迴換取捨頗有裨益周朝授

儀同大將軍載師大夫其事行史闕故不列於傳齊末又有并省尙書隴西辛慤散騎常侍長樂潘子義並以才幹知名入仕周隋位歷通顯云

論曰李稚廉等以材能器幹所在咸著聲名封述聚積財賄敝於鄙吝季良以學淺爲累文宗以附會見稱然則羊李二賢足爲具美士人君子可不慎與

贊曰惟茲數賢幹事貞固生被雌黃歿存縑素封及源許終爲身蠹

北齊書卷四十三考證

封述傳大昌中除尙書三公郎中○北史大昌作天平

子元○北史作元舊

許惇傳父護魏高陽章武二郡太守○

臣範

按北史止言爲州主簿不言二郡太守

源彪傳父子恭魏中書監司空文獻公○

臣範

按史例公字疑屬司空之下文獻上疑脫謚字

且琳之于曇瑱○通鑑無瑱字

北齊書卷四十三考證

北齊書卷四十四

隋太子通事舍人李百藥撰

列傳第三十六

儒林

李鉉

刁柔

馮偉

張買奴

劉軌思

鮑季詳

邢峙

劉霽

馬敬德

子元熙

張景仁

權會

張思伯

張雕

孫靈暉

石曜

班固稱儒家者流蓋出於司徒之官助人君順陰陽行教化者也聖人所以明天道正人倫是以古先哲王率由斯道高祖生於邊朔長於戎馬之間因魏氏喪亂之餘屬余朱殘酷之舉文章咸盪禮樂同奔弦歌之音且絕俎豆之容將盡及仗義建旗掃清區縣以正君臣以齊上下至乎一人播越九鼎潛移文武神器顧眄斯在猶且援立宗支重安社稷豈非踴名教之地漸仁義之風與屬疆場多虞戎車歲駕雖序之制有所未遑而儒雅之道遽形心慮魏天中范陽盧景裕同從兄禮於本郡起逆高祖免其罪置

之賓館以經教授太原公以下及景裕卒又以趙郡李同軌繼之二賢並大蒙恩遇待以殊禮同軌之亡復徵中山張雕渤海李鉉刁柔中山石曜等遞爲諸子師友及天保大寧武平之朝亦引進名儒授皇太子諸王經術然爰自始基暨於季世唯濟南之在儲宮性識聰敏頗自砥礪以成其美自餘多驕恣傲狠動違禮度日就月將無聞焉爾鏤冰雕刻迄用無成蓋有由也夫帝子王孫稟性淫逸況義方之情不篤邪僻之路競開自非得自生知體包上智而內有聲色之娛外多犬馬之好安能入便簞行出則友賢者也徒有師傅之資終無琢磨之實下之從化如風靡草是以世胄之門罕聞強學若使貴遊之輩飾以明經可謂稽山竹箭加之以括羽俯拾青紫斷可知焉而齊氏司存或失其守師保疑丞皆賞勳舊國學博士徒有虛名唯國子一學生徒數十人耳欲求官正國治其可得乎胄子以通經仕者唯博陵崔子發廣平宋遊卿而已自外莫見其人幸朝章寬簡政網疎闊遊手浮惰十室而九故橫經受業之侶遍於鄉邑負笈從官之徒不遠千里伏膺無怠善誘不倦入閭里之內乞食爲資憩桑梓之陰動逾千數燕趙之俗此衆尤甚齊制諸郡並立學置博士助教授經學生俱差逼充員士流及豪富之家皆不從調備員既非所好墳籍固不關懷又多被州郡官人驅使縱有遊惰亦不檢治皆由上非所好之所致也諸郡俱得察孝廉其博士助教及遊學之徒通經者推擇充舉射策十條通八以上聽九品出身其尤異者亦蒙抽擢

凡是經學諸生多出自魏末大儒徐遵明門下河北講鄉康成所注周易遵明以傳盧景裕及清河崔瑾景裕傳權會權會傳郭茂權會早入京都郭茂恒在門下教授其後能言易者多出郭茂之門河南及青齊之間儒生多講王輔嗣所注周易師訓蓋齊時儒士罕傳尙書之業徐遵明兼通之遵明受業於屯留王總傳授浮陽李周仁及渤海張文敬及李鉉權會並鄭康成所注非古文也下里諸生略不見孔氏注解武平末河間劉光伯信都劉士元始得費昶義疏乃留意焉其詩禮春秋尤爲當時所尙諸生多兼通之三禮並出遵明之門徐傳業於李鉉沮偽田元鳳馮偉紀顯敬呂黃龍夏懷敬李鉉又傳授刁柔張買奴鮑季祥邢峙劉畫熊安生安生又傳孫靈暉郭仲堅丁恃德其後生能通禮經者多是安生門人諸生盡通小戴禮於周儀禮兼通者十二三焉通毛詩者多出於魏朝博陵劉獻之獻之傳李周仁周仁傳董令度程歸則歸則傳劉敬和張思伯劉軌思其後能言詩者多出二劉之門河北諸儒能通春秋者並服子慎所注亦出徐生之門張買奴馬敬德邢峙張思伯張雕劉畫鮑長暄王元則並得服氏之精微又有衛覬陳達潘叔度雖不傳徐氏之門亦爲通解又有姚文安秦道靜初亦學服氏後更兼講杜元凱所注其何外儒生俱伏膺杜氏其公羊穀梁二傳儒者多不措懷論語孝經諸學徒莫不通講諸儒如權會李鉉刁柔熊安生劉軌思馬敬德之徒多自出義疏雖曰專門亦皆粗習也今序所錄諸生或終於魏朝

或名宦不達縱能名家又闕其由來及所出郡國並略存其姓名而已俱取其尤通顯者列於儒林云熊安生名在周史光伯士元著於隋書輒不重述

李鉉字寶鼎渤海人也九歲入學書急就篇月餘便通家素貧苦常春夏務農冬乃入學年十六從浮陽李周仁受毛詩尚書章武劉子猛受禮記常山房蚪受周官儀禮漁陽鮮于靈馥受左氏春秋鉉以鄉里無可師者遂與州里楊元懿河間宗惠振等結侶詣大儒徐遵明受業居徐門下五年常稱高第二十三便自潛居討論是非撰定孝經論語毛詩三禮義疏及三傳異同周易義例合三十餘卷用心精苦曾三冬不畜枕每至睡時假寐而已年二十七歸養二親因教授鄉里生徒恒至數百燕趙間能言經者多出其門年三十六丁父喪服闋以鄉里寡文籍來遊京師讀所未見書州舉秀才除太學博士武定中李同軌卒後高祖令世宗在京妙簡碩學以教諸子世宗以鉉應旨徵詣晉陽時中山石曜北平陽絢北海王暕清河崔瞻廣平宋欽道及工書人韓毅同在東館師友諸王鉉以去聖久遠文字多有乖謬感孔子必也正名之旨乃喟然有刊正之意於講授之暇遂覽說文爰及倉雅刪正六藝經注中謬字名曰字辨顯祖受禪從駕還都天保初詔鉉與殿中尚書邢邵中書令魏收等參議禮律仍兼國子博士時詔北平太守宋景業西河太守慕容懷文等草定新厯錄尚書平原王高隆之令鉉與通直常侍房延祐國子

博士刁柔參考得失尋正國子博士廢帝之在東宮顯祖詔鉉以經入授甚見優禮數年病卒特贈廷尉少卿及還葬故郡太子致祭奠之禮并使王人將送儒者榮之陽元懿宗惠振官亦俱至國子博士

刁柔字子溫渤海饒安人也父整魏車騎將軍贈司空柔少好學綜習經史尤留心禮儀性強記至於氏族內外多所諳悉初爲世宗挽郎出身司空行參軍喪母居喪以孝聞永安中除中堅將軍奉車都尉加冠軍將軍中散大夫元象中隨例到晉陽高祖以爲永安公府長流參軍又令教授諸子天保初除國子博士中書舍人魏收撰魏史啟柔等與同其事柔性頗專固自是所聞收常所嫌憚又參議律令時議者以爲立五等爵邑承襲者無嫡子立嫡孫無嫡孫立嫡子弟無嫡子弟立嫡子孫弟柔以爲無嫡孫應立嫡曾孫不應立嫡子弟議曰柔案禮立適以長故謂長子爲嫡子嫡子死以嫡子之子爲嫡孫死則曾玄亦然然則嫡子之名本爲傳重故喪服曰庶子不爲長子三年不繼祖與禰也禮記公儀仲子之喪檀弓曰何居我未之前聞仲子舍其孫而立其弟何也子服伯子曰仲子亦猶行古人之道也昔者文王舍伯邑考而立武王發微子舍其孫盾而立弟衍仲子亦猶行古之道也鄭注曰仲子爲親者諱耳立子非也文王之立武王權也微子嫡子死立其弟衍殷禮也子游問諸孔子孔子曰不立孫注曰據周禮然則商以嫡子死立嫡子之母弟周以嫡子死立嫡子之子爲嫡孫故春秋公羊之義嫡子有孫而死質家親親